

Sabastian Zustignan, el cavalier, à refudà, sier Piero Pasqualigo, doctor, et cavalier, fo ambassador in Spagna, e acetò; et il scurtinio è stà notado qui avanti. *Etiam* fo electo lector im philosophia sier Sabastian Foscarini, el dotor, di sier Piero.

80\* In questi zorni, verso la sera ogni dì pioveva, et era mal per le biave, et si feva ogni zorno precession a San Marco, et per le chiesie, pregando Idio non fazi più piover; e le segale si taja; et intisi, per bisogno, a Piove di Sacho le segale fresche fo secà in forno.

*A dì 15 ditto.* Zonse Tomà Duodo, patron di nave, vien di Soria con gotoni e zenere, è piú vechio di le altre nave, perhò 0 disse di novo. Et in questa matina fo fato la precession di San Vido, e il pasto di zoveni. Portò la spada sier Marin Zorzi, dotor, va capetanio a Brexa; fo suo compagno sier Pelegrin Memo. Da poi disnar fo colegio.

Et in questa matina, ritornato il principe di San Vido, fo sonato campanò, per la morte di sier Marin di Garzoni, procurator; si farà doman.

*A dì 16, luni.* Da poi disnar fo grah consejo. Fu fato procurator sier Domenego Marin, era savio dil consejo. Eramo a consejo 1427; et era 4 fioli dil principe a consejo, per ajutar sier Alvise Venier.

*Electo procurator di San Marco, sopra le commessarie di qua da canal, in luogo di sier Marin di Garzoni, a chi Dio perdoni.*

Sier Constantim di Prioli, fo savio dil consejo, <i>quondam</i> sier Zuan, procurator, . . . . .	587
Sier Andrea Griti, el consier, <i>quondam</i> sier Francesco, . . . . .	577
Sier Piero Balbi, è luogo tenente in Cyprì, <i>quondam</i> sier Alvise, . . . . .	411
— Sier Polo Trivixam, el cavalier, fo capetanio a Padoa, . . . . .	670
Sier Antonio Trun, el savio dil consejo, <i>quondam</i> sier Stai, . . . . .	629
Sier Lunardo Grimani, fo savio dil consejo, <i>quondam</i> sier Piero, . . . . .	243
— Sier Alvixe Venier, el consier, <i>quondam</i> sier Francesco, <i>quondam</i> sier Alvixe, procurator, . . . . .	697
Sier Andrea Venier, fo capetanio a Padoa, <i>quondam</i> sier Liom, . . . . .	635
Sier Francesco Bernardo, fo consier, <i>quondam</i> sier Pollo, procurator, . . . . .	384
— Sier Zorzi Corner, el cavalier, fo podestà a Padoa, <i>quondam</i> sier Marco, el cavalier, . . . . .	651

— Sier Domenego Marin, fo capetanio a Padoa, <i>quondam</i> sier Carlo, . . . . .	924
Sier Nicolò Foscarini, fo capetanio a Padoa, <i>quondam</i> sier Alvise, procurator, . . . . .	902

1431 *Di questi fono rebalotadi quatro.*

Sier Alvixe Venier, el consier, <i>quondam</i> sier Francesco, <i>quondam</i> sier Alvixe, procurator, . . . . .	584
† Sier Domenego Marin, fo capetanio a Padoa, <i>quondam</i> sier Carlo, . . . . .	857
Sier Polo Trivixam, el cavalier, fo capetanio a Padoa, <i>quondam</i> sier Andrea, . . . . .	595
Sier Nicolò Foscarini, fo capetanio a Padoa, <i>quondam</i> sier Alvise, procurator, . . . . .	704

Et fo balotà il resto di le voxe; et capetanio a Ravena, e dil consejo di X, niun passò.

*A dì 17 zugno.* La matina sier Domenego Marin, electo procurator, fo a la Signoria, ben acompagnato, et li fo dato le chiave. *Item*, vene sier Antonio da Canal, venuto governador di Brandizo, et referite quanto era occorso in el suo tempo.

Da poi disnar fo pregadi. Et fo leto le infrascripte lettere:

*Di Roma.* Come l'orator à ricevuto le nostre lettere zercha il vescoa' di Cremona, et l' hora era tarda, anderà dal papa. *Item*, che 'l papa à scritto a Zuan di Saxadello uno breve, che li dispiace quanto à fato contra el signor di Pexaro, e che 'l debbi levar quelle zente; et cussi scrisse uno breve al segretario di Pexaro, è contra il suo voler.

*Di Elemagna, do letere.* Il re à l' impresa di Geler, et scrive di quelle cosse; et non era nulla da conto.

Fu posto, per sier Andrea Gritti, consier, sier Sabastian Balbi, cao di 40, li savij dil consejo, *excepto* sier Antonio Trun, li savij di terra ferma, *excepto* sier Andrea Loredan, atento il breve dil papa et le sententie aute in Rota, che sia dato il possesso di l' abazia di le Carzere al reverendissimo cardinal Grimani, dando segurtà un banco, *videlicet* quel di Pixani, ai frati camalduensi, qualli fono im possession, di star a raxon; et sier Antonio Trun, e sier Andrea Loredan, messeno dar licentia a li frati, non obstante le leze, che possino andar in Rota, a difender le sue raxon; et in questo mezo l' intrade siano poste in deposito, riservato il viver de li frati vi sono. Parlò sier Andrea Gritti; rispose sier Antonio Trun; parlò poi sier Zuan Trivixam, e fo molto lon-